

Lès frites.

Mi, ç' qui dj' mougne voltî, c'est dès frites :
Dèl vraîye crauche, dès bons canadas.
Parèt qu' '-gn-a dès gouts qu' on-z-èrite,
Si c'est l' vraî, c'est bin sûr mi cas.
I-gn-a nin qu'è nosse Walonîye
Qu'on s' vante voltî d' fé lès mèyeûs !
Lès Flaminds boutenut po qu'on dîye
Qui, là ossi, i nos-ont yeû.
Mins zèls, c'est dès frites èdjaléyes
Dès-eûres au long, èt co pa-d'là ;
I n'ont nin compris qui l' minéye
Qui lès djostéye, ça vint di d'là.
I s' pinsenut pus malins qui l's-ôtes :
" I n' sont nin Bèljes, i sont Flaminds ! "
Lès preûves ? Waîtiz come on-z-î vôte :
Bârt' a mostré sès grands laîds dints.
I n' mougne pupont d' frites èdjaléyes,
Pus nin one waufe, adîè l' pwin d' tchin !
Pont d' chôcolat, fini l' jèléye ;
Dèl tchau, do pèchon, do boudin !
Bârt', vola d'dja saquants-anéyes
Qui dj'aveu l' dâr di v' rèscontrer.
Oyi, mins ç' còp ci, dj'a l'idéye
Qu'on-z-a dès vraîs à s' foute au nez.
Lès frites, ci n'èsteut qu'one èscuse
Po v' cofèssî ç' qui dj' pinse di vos
Èt v's-èspliquer ç' qui s' passe au jusse :
C'èst qu' nos nos r'chonans, compurdoz ?
Vos vloz à tot pris candjî l' monde !
Vos-avoz pièrdu... mwints kulos ;
Swèssante !!! Si ç' n'èst qu' po yèsse à l' môde,
Lèyîz m' vos dîre : Vos-è r'vêroz !
Si vos div'noz l' mayeûr d' Anvèrs',
Rin qu' pace qui v's-avoz ramwinri,
Èt bin mi, Bârt', dji su fin près'
À mwinrner l' rèstant do pays :
S'on vout fé l' compte , su m' vikérîye,
Dj'a pièrdu passé cint kulos !
Èt vos ? Swèssante ! Faut bin qu'on rîye :
Por mi, vos n'èstoz qu'on bèrjot.
C'èst qu'i m'ènn'a falu d's-anéyes,
Dji m'î a r'pris à saquants còps !
Vosse pwèd a ravalé d'embléye
Po n' pus jamais r'monter pus wôt !
Vormint, gn-a pèrson.ne qui v's-èspêche
Di porchûre ci qu' vos fioz si bin !
Ni fuchîz nin sbaré si dj' prêtche :

Vosse novia portraît m' plaît vraîmint.
Pièrdoz-è cor one swèssantin.ne !
Ci qu'on-z-a fait, on l' pout co r'fé !
Èt tûzez qu'i n' faut nin qu' ça trin.ne :
Deûs mile quatôze va ariver !
Si dj'a pris l' libèrté d' vos scrîre,
C'èst qu' nos deûs p'tits noms s' richonenut :
"BÂRT" " " èt "BÊRT", fwârt aujîys à lîre,
Ci n'èst qu' deûs p'tits mots, qui sonenut.
Nos noms, ti dîreus veûy dès frères,
"BÂRT" "n'a qu'one faflote dipus qu' mi !
Sièrvos v' di lèye, fuchîz-è fiér,
Aurdez l', aclapez l' su l' kèpi !
Mins vosse faflote, qui lance è l'aîr
Mi fait r'tûzer à totes lès mwins
Qu'on lèveut au wôt po Hitlêr !
Portant, dji n'èsteu qu'on gamin.
Eûchîz-è sogne, di vosse faflote !
Pwartz l' come one dècorâcion.
Mi, dji m' va bwâre one pitite gote
Èt djouwer sèt' lignes au couyon !
Lès-ans passenut, èt lès-idéyes
Di tènawète si r'novèlenut ;
Soufrances, misères on còp passéyes,
Nos-èfants n' s'è sovèront pus.
Nos tayons m' fyin.n' todi sorîre
En d'djant qui l' pus bièsse dès baudèts
N' bukeut nin deûs còps su l' m' minme pîre,
Mins n's-èstans dès tièstus mulèts !

Albert Delvaux
Octôbe 2012.

Dès vraîs : la vérité.
Bèrjot : carottier.